



捉貓子看貓嫲

頭擺莊下人个屋下，大體有一間穀倉放穀，所以差毋多逐家就會畜一條貓仔來打老鼠，捉貓子來畜該時，就會聽著人講：「捉貓子愛看貓嫲喔。」意思係講會打老鼠个貓嫲，正會降有會打老鼠个貓子，就像這下人講个，有仰般个阿姆，就有仰般个妹仔。毋過，在佢身上，這句俗諺一滴就無準。

「削麼个鉛筆，像刻極樂仔樣！」阿姆看等佢削个鉛筆，緊笑緊搖頭，當毋中意，佢做麼个就要求亮亮線線、伶伶俐俐，最惱律律不不、儘儘採採。所以逐暗晡除了撻佢兜个鉛筆削好好以外，還撻佢兜个手巾仔、衛生紙、帽仔這兜上課愛戴个東西準備好好。佢个布鞋哪時就白白、皮鞋永久就金金；讀書衫熨到亮亮、書包洗到淨淨，先生長下當阿腦。毋過，這無一項係佢自家做个，在同學眼中，佢係生活上个大戇仔。

「行開，行開！會分佢踩死。」看阿姆在灶下無閒直掣想愛搵手，腳還言踏落去，就分佢追走，毋係嫌佢徑手徑腳，就係嫌佢驚燒怕冷。因為恁樣，佢一直到行嫁前，還毋識洗隻碗、煮餐飯，朋友全知佢係斯曉茶來伸手、飯來開口个大有嫲。

「細人仔珍著你還衰過，一隻板就打毋出來食。」阿姆愁咄咄仔講，人講惜子連孫，到這下八十零歲咧，過年過節，還愛打板、刷雞鴨分這兜麼个就毋曉个俵仔、妹仔、孫仔、孫女食。想起來實在不孝，佢這兜已經做阿公、阿婆个人咧，還愛年老个阿姆愁勞博激、幫幫撥撥。

「能幹个阿姆造成低能个子女。」這係佢个經驗摻感想，係講佢姆係一條當會打老鼠个貓嫲，佢就係一條毋且毋會打老鼠，還可能分老鼠食忒个貓子。做爺哀儕實在毋使撻子女做暢多、暢周到，成時愛放手，分細人仔有學習、成長个機會，正做得在這千變萬化个時代好好生存摻同人競爭。

作者：張美容

☆詞彙學習☆

【亮亮線線】lang^ˇ lang^ˇ sien^ˇ sien^ˇ：整齊、光亮美麗。

【踩死】dio si^ˊ：踩死。

【追走】dui^ˋ zeu^ˊ：趕走。

【驚燒怕冷】giang^ˋ shau^ˋ pa^ˇ lang^ˋ：喻做事怕東怕西，不乾脆。

【有嫲】sio ma：呆愚的女人。

【愁咄咄仔】seu dud dud er：憂慮的樣子。

【暢多】tiong^ˊ do^ˋ：太多。

☆文法學習☆

【緊……緊……】有二義：1.越……越……；2.邊……邊……。

例 1：佢緊大緊靚。(她越大越美。)

例 2：佢緊行緊食。(他邊走邊吃。)